



Broj: 05/7-39-1-158-70/21

Sarajevo, 27. 4. 2021.

Z A P I S N I K

70. sjednice Vijeća nacionalnih manjina BiH, održane 23. 4. 2021.

Sjednica Vijeća nacionalnih manjina BiH počela je u 14. 30 sati.

Sjednici su prisustvovali: Andrija Svatok, predsjedavajući, Tihomir Knežiček, Jovanka Manzalović-Šalaka, Velibor Kuvač, Dragan Marković, Todorka Jovanović, Silvija Vujović, Hakan Varan, Eva Pašić-Juhas, Mladen Radmilović, Halil Bicaj, Tijana Vučurević i Dejan Piotrovski.

Opravdano su odsustvovali: Vjeročka Gajić, Davor Ebner, Marija Grbić, Nedžad Jusić i Jakob Finci.

Sjednici su, također, prisustvovali: Maja Lukić-Schade, iz Ureda Vijeća Evrope u BiH, Enver Bogućanin iz Sektora za odnose s javnošću Sekretarijata Parlamentarne skupštine BiH i Aida Kreho, sekretarka Zajedničke komisije za ljudska prava.

Nakon otvaranja sjednice, kao tačka 3. dnevnog reda predložena je verifikacija sadržaja dopisa upućenog od Vijeća nacionalnih manjina BiH načelniku Općine Ilidža i predsjedavajućem Općinskog vijeća Ilidža.

S obzirom na to da je prijedlog prihvaćen, sjednica je imala sljedeći

DNEVNI RED

1. Usvajanje Zapisnika 69. sjednice Vijeća nacionalnih manjina BiH;
2. Razmatranje Informacije Ureda Vijeća Evrope u BiH o dodijeljenim sredstvima granta udruženjima nacionalnih manjina tokom 2020. godine;
3. Verifikacija dopisa načelniku Općine Ilidža i predsjedavajućem Općinskog vijeća u vezi s deložacijom romskog naselja iz Velike Aleje;
4. Tekuća pitanja.

Ad. 1. Usvajanje Zapisnika 69. sjednice Vijeća nacionalnih manjina BiH

Predsjedavajući Vijeća nacionalnih manjina BiH otvorio je raspravu o ovoj tački dnevnog reda. S obzirom na to da nije bilo rasprave, pristupilo se glasanju, te je Zapisnik jednoglasno usvojen.

Ad. 2. Razmatranje Informacije Ureda Vijeća Evrope u BiH o dodijeljenim sredstvima granta udruženjima nacionalnih manjina tokom 2020. godine

Prije otvaranja diskusije, riječ je data Maji Lukić-Schade radi izlaganja sadržaja informacije o dodijeljenim sredstvima udruženjima nacionalnih manjina tokom 2020. godine. Istaknuto je da su sredstva granta dodjeljivana u dva navrata, te su u prvom dodijeljena tri, a u drugom šest grantova, dok je ostatak sredstava dodijeljen za borbu protiv govora mržnje i zaštitu prava LGBTI osoba. U odgovoru na diskusiju Eve Pašić-Juhas potvrđeno je da je većina grantova realizirana u periodu od tri mjeseca, te da je period realizacije projekta bio kraći, iznimno, usljed pandemije koronavirusa. Na pitanje Todorke Jovanović koja su udruženja, koja okupljaju nacionalne manjine, dobila grant sredstva, Maja Lukić-Schade navela je da se radilo o udruženjima Bolja budućnost, Akcija, Alfa, te zajedno Rino Zandonai i Boljševi.

Članovi Vijeća jednoglasno su primili informaciju k znanju.

Ad. 3. Verifikacija dopisa načelniku Općine Ilidža i predsjedavajućem Općinskog vijeća u vezi s deložacijom romskog naselja iz Velike Aleje

Velibor Kuvač je, kao inicijator upućivanja dopisa, podsjetio članove Vijeća na sadržaj upućenog dopisa načelniku Općine Ilidža i predsjedavajućem Općinskog vijeća u vezi s deložacijom romskog naselja iz Velike Aleje, te ih upoznao s aktivnostima nadležnih organa

koje su uslijedile po upućivanju dopisa, a u smislu odgode deložacije do osiguravanja privremenog ili stalnog smještaja za Rome. U raspravi su učestvovali Andrija Svatok i Jovanka Manzalović-Šalaka. U vezi s prijedlogom gđe Šalaka da se Vijeće tromjesečno obavještava o učinjenom po ovom pitanju, dogovoreno je da se za narednu sjednicu definira prijedlog dopisa, s ciljem obavezivanja nadležnih da Vijeću dostavljaju ažurirane informacije.

Ad. 4. Tekuća pitanja

Predsjedavajući je riječ dao Draganu Markoviću, koji je ukazao na veoma težak položaj udruženja nacionalnih manjina za vrijeme pandemije koronavirusa. Istaknuto je i da se određeni nivoi vlasti u BiH ne pridržavaju obaveze propisane Zakonom o pravima nacionalnih manjina i Okvirnom konvencijom za zaštitu nacionalnih manjina da osiguraju sredstava iz budžeta za pomoć nacionalnim manjinama, uz navodno obrazloženje da se ta sredstva preusmjeravaju za borbu protiv koronavirusa. Ovakva situacija, navedeno je, uticala je na nemogućnost djelovanja udruženja nacionalnih manjina, izmirivanja obaveza prema javnim preduzećima i slično. U raspravi su učestvovali **Velibor Kuvač**, koji je istaknuo kako se radi o situaciji koja nije u neposrednoj vezi sa izbijanjem pandemije, te da problem postoji čak i od ranije, za što je kao primjer naveo sredstva iz budžeta FBiH koja se, na papiru, izdvajaju za nacionalne manjine, ali nikada ne budu u tu svrhu iskorištena; **Tihomir Knežiček**, koji je podsjetio na već i ranije upućene dopise institucijama svih nivoa vlasti, kojima se oni podsjećaju na svoje obaveze prema nacionalnim manjinama, ali i istaknuo da postoje i neki organi vlasti koji dosljedno provode sve svoje obaveze; **Jovanka Manzalović-Šalaka**, koja je navela primjer rada i aktivnosti koje provodi udruženje 'Češka beseda' Sarajevo, **Andrija Svatok**, koji je naveo način rada i probleme s kojima se susreću udruženja koja djeluju na području Prnjavora, te **Maja Lukić-Schade** koja je istaknula važnost teme i obaveza različitih nivoa vlasti prema domaćim zakonskim propisima i međunarodnim dokumentima ratificiranim od BiH, te podsjetila na dosadašnje aktivnosti Ureda Vijeća Evrope i Koordinacionog odbora u prethodnom sazivu. U diskusiji o potencijalnim rješenjima ovog problema učestvovali su: Dejan Piotrovski, Hakan Varan, Jovanka Manzalović-Šalaka, Velibor Kuvač i Eva Pašić-Juhas.

Nakon rasprave, jednoglasno je prihvaćen prijedlog da se za narednu sjednicu pripremi prijedlog dopisa kojim će se svim nivoima vlasti ukazati na zakonsku obavezu osiguravanja sredstava za nacionalne manjine iz sredstava budžeta tih nivoa vlasti, dok je predstavnici Ureda Vijeća Evrope u BiH predloženo da se o ovoj temi razgovara i na nekom od narednih sastanaka Koordinacionog odbora.

Sjednica je završena u 15.30 sati.

**Sekretarka Zajedničke komisije
za ljudska prava
Aida Kreho**

**Predsjedavajući
Vijeća nacionalnih manjina BiH
Andrija Svatok**